



UNIVERSIDADE DA CORUÑA

**REGULAMENTO DE SÍMBOLOS, HONRAS E PROTOCOLO
DA UNIVERSIDADE DA CORUÑA
(aprobado no Consello de Goberno de 22 de xullo de 2005)**

Este regulamento aspira a regular as precedencias, as honras, os símbolos e o cerimonial da Universidade da Coruña nun texto único que recolla con sinxeleza todos estes extremos, non só co obxecto de articular a organización interna dos actos académicos, senón tamén para establecer claramente o lugar que corresponde segundo o protocolo e cerimonial universitario ás persoas asistentes aos actos académicos que non pertencen á comunidade universitaria, así como para configurar definitivamente algúns símbolos propios da actividade institucional e universitaria cuxa regulación resulta precisa na actualidade.

Para a elaboración deste regulamento tívose presente a normativa vixente en materia de precedencias, honras e cerimonial nas institucións públicas. Principalmente, o Real Decreto 2099/1983, do 4 de agosto, por que se aproba o Regulamento Xeral de Precedencias do Estado, texto básico de aplicación aos actos oficiais organizados por todas as administracións públicas. Doutro lado, as disposicións ditadas ao longo do século XIX e principios do século XX acerca dos símbolos, do protocolo e do cerimonial universitario, tiveron especial importancia para redactar os preceptos correspondentes deste regulamento. Cabe salientar os Reais decretos de 6 de marzo e 2 de outubro de 1850, sobre o traxe e as insignias académicas; a Lei de instrución pública, do 9 de setembro de 1857; o Real decreto do 22 de maio de 1959, por que se aprobou o Regulamento das universidades; e o Real decreto do 10 de xaneiro de 1931, relativo a solemnidades das universidades e actos de estilo.

Por outra banda, para a definición dos nosos símbolos acudiuse ao acervo histórico recollido pola heráldica, buscando adoptar aqueles elementos cuxo significado se relaciona co saber e o cultivo das ciencias, así como a incorporación de símbolos propios da cultura coruñesa (é o caso do emblema da universidade, ligado tradicionalmente coa Torre de Hércules), aos que se lles busca e concede un novo significado, evidenciando así o estreito vínculo existente entre a universidade e a sociedade en que se arraiga e coa que pretende avanzar harmonicamente, compartindo non só as súas inquedanzas, senón tamén os seus sinais de identidade.

Para concluír cabe lembrarmos que, desde a súa creación, a Universidade da Coruña quixo conxugar tradición e modernidade nos seus actos académicos solemnes. Este Regulamento pretende profundar nesa liña, respondendo ás directrices que a propia comunidade universitaria coruñesa manifestou acerca do funcionamento da universidade.

**TÍTULO I
DAS PRECEDENCIAS**



UNIVERSIDADE DA CORUÑA

Artigo 1. Réxime e alcance da organización de precedencias nos actos académicos

1. O réxime de precedencias previsto neste título será de aplicación para os efectos protocolarios na organización de actos académicos por todos os órganos da Universidade da Coruña, entendidos como actos oficiais de carácter especial conforme ao establecido no artigo 3, letra b), do Real Decreto 2099/1983, de 4 de agosto.

2. O alcance das súas normas queda limitado ao devandito ámbito, sen que a súa determinación confira por si honra ou xerarquía, nin implique, fóra del, modificación do propio rango, competencia ou funcións recoñecidas ou atribuídas pola lei.

Artigo 2. Definición de acto académico e responsabilidade da súa organización

1. Para os efectos de aplicación deste regulamento defínese como acto académico aquel que for promovido e organizado de xeito oficial por calquera órgano de goberno da Universidade da Coruña, aínda que se celebre en instalacións ou dependencias externas á Universidade. Os titulares dos órganos unipersoais de goberno da Universidade da Coruña procurarán a celebración de todos os actos académicos en instalacións propias da Universidade da Coruña.

2. A organización protocolaria dos actos académicos promovidos polo órganos colexiados e unipersoais de goberno da Universidade da Coruña, ou daqueles que foren presididos polo/a reitor/a ou polos membros do seu equipo de dirección, corresponde á Secretaría Xeral, que ademais prestará asesoramento cando así se lle requirir para a organización protocolaria dos restantes actos académicos.

Artigo 3. Presidencia dos actos académicos

1. O/A reitor/a asumirá a presidencia daqueles actos académicos a que asista, con independencia do lugar en que se celebraren. Cando acuda na súa representación un membro do equipo de dirección, será este quen presida o acto.

2. Os restantes actos académicos serán presididos pola autoridade académica que os organizar, salvo que por causa xustificada decida ceder a presidencia a algún dos participantes no acto en quen concorreren circunstancias acreedoras desta honra.

Artigo 4. Organización da mesa presidencial dos actos académicos

1. Salvo excepción xustificada por razóns de organización, a mesa presidencial dos actos académicos terá un número impar de compoñentes, ocupando o seu centro a presidencia e situando o resto de ocupantes sucesivamente a dereita e esquerda do presidente de acordo coa súa correspondente precedencia.

2. Cando a mesa presidencial estiver composta simultaneamente por membros da comunidade universitaria e por persoas alleas á universidade, poderá organizarse unha presidencia intercalada dobre, isto é, formando dúas liñas distintas de precedencia a esquerda e dereita da presidencia,



UNIVERSIDADE DA CORUÑA

ocupando unha delas as persoas participantes alleas á comunidade universitaria e a outra os membros da comunidade universitaria.

Artigo 5. Precedencias dos representantes de autoridades e universidades

1. A persoa que representar no seu cargo a unha autoridade superior á do seu propio rango non gozará da precedencia recoñecida á autoridade que representa e ocupará o lugar que lle corresponda polo seu propio rango, salvo que ostente expresamente a representación da Súa Maxestade o Rei ou do Presidente do Goberno.

2. Sen prexuízo do disposto no apartado anterior, as persoas que asistiren aos actos da Universidade da Coruña en representación doutras universidades poderán ostentar a xuízo da persoa organizadora a precedencia que se recoñece aos cargos académicos equivalentes da Universidade da Coruña, integrándose no lugar reservado á comunidade universitaria no público do lugar de celebración do acto.

Artigo 6. Precedencia entre cargos académicos

1. Establécese a seguinte precedencia entre cargos académicos:

- a) Reitor/a.
- b) Restantes membros do equipo de dirección.
- c) Cargos académicos con rango asimilado ao de vicerreitor/a.
- d) Decano/a ou director/a de centro e cargos asimilados.
- e) Director/a de departamento e cargos asimilados.
- f) Director/a de instituto universitario de investigación e cargos asimilados.
- g) Vicedecano/a, subdirector/a e secretario/a de centro e cargos asimilados.
- h) Secretario de departamento e cargos asimilados.

2. Os cargos académicos que ostentaren igual nivel de precedencia conforme ao disposto no apartado anterior prelaciónanse entre si de acordo coa súa categoría e antigüidade nesta, entendéndose que os corpos docentes universitarios ostentan precedencia sobre os restantes. Non obstante, o/a reitor/a poderá adoptar criterios diferentes de prelación no relativo á súa suplencia por un/unha vicerreitor/a, ou á suplencia dos vicerreitores entre si, de acordo co disposto nos Estatutos da Universidade da Coruña. Para os efectos previstos por este artigo así como para os demais de aplicación, os acordos de creación de cargos académicos sinalarán o seu rango ou a súa asimilación a un rango.

3. Sen prexuízo do disposto no artigo 3 deste Regulamento, o/a Presidente do Consello Social, en tanto que máximo/a representante do órgano de participación da sociedade na universidade, ocupará un lugar preeminente e de honra nos actos académicos organizados pola Universidade da Coruña.



UNIVERSIDADE DA CORUÑA

Artigo 7. Precedencia entre as persoas asistentes aos actos académicos que non pertencen á comunidade universitaria

1. A prelación entre autoridades e personalidades que participen nos actos de carácter especial organizados pola Universidade da Coruña se fixa conforme ao disposto na normativa estatal e autonómica, así como nas restantes disposicións de aplicación, recolléndose no Anexo I.
2. Cando por razóns de organización resultar excepcionalmente preciso articular unha precedencia colexiada, rexerá o artigo 16 do Real Decreto 2099/1983, coa excepción de que o Claustro Universitario, na súa condición de autoridade organizadora do acto, ostentará a maior precedencia.
3. A asistencia oficial aos actos académicos de autoridades non recollidas nas prelacións que recolle este Regulamento será atendida pola Secretaría Xeral, reservando á persoa asistente un lugar acorde co seu rango e dignidade.
4. As autoridades eclesiásticas que asistiren oficialmente aos actos académicos disporán, así mesmo, dunha precedencia axeitada ao seu rango e dignidade.

TÍTULO II DAS HONRAS

Artigo 8. Das Medallas da Universidade da Coruña

1. O Consello de Goberno poderá conceder a Medalla da Universidade da Coruña ás persoas físicas ou xurídicas que prestasen relevantes servizos á Universidade da Coruña, ou que salientasen no campo da investigación científica ou no do ensino universitario, no cultivo das ciencias, das artes ou das letras, no desenvolvemento de actividades humanitarias ou na protección do medio e da paz.
2. O Consello de Goberno poderá conceder a Medalla de Ouro da Universidade da Coruña a quen, reunindo algunha das circunstancias estipuladas no apartado anterior, se faga ademais especialmente merecedor desta distinción polo carácter extraordinario dos servizos prestados á universidade ou por desempeñar altas responsabilidades internacionais, nacionais, autonómicas ou locais.

Artigo 9. Descrición das Medallas

1. A Medalla da Universidade da Coruña está composta, no seu anverso, polo emblema da universidade cuñado en metal dourado, con fondo de esmalte púrpura pendente de vieira ou fita desta mesma cor; e no seu reverso pola indicación da súa data de concesión.
2. A Medalla de Ouro da Universidade da Coruña está composta, no seu anverso, polo emblema da universidade cuñado en ouro, pendente de vieira ou fita de cor dourada; e no seu reverso pola indicación da súa data de concesión.

Artigo 10. Procedemento para a concesión das Medallas

1. Para a concesión das Medallas seguírase o seguinte procedemento:



UNIVERSIDADE DA CORUÑA

- a) O procedemento para a concesión da Medalla de Ouro iniciárase por proposta do/a reitor/a, ou da maioría absoluta dos membros do Consello de Goberno. O procedemento para a concesión da Medalla poderá iniciarse ademais, por proposta dun terzo dos centros da Universidade. Acompañarase relación de méritos ou circunstancias que concorreren na persoa ou entidade proposta.
 - b) A proposta de concesión formulada conforme a calquera das iniciativas anteriores remitirase á Secretaría Xeral da Universidade, acompañada do currículo ou relación de actividades de relevo da persoa física ou xurídica nominada, someténdose a aprobación do Consello de Goberno. Evitarase dar publicidade ao currículo da persoa proposta para a concesión, quedando depositado este documento na Secretaría do órgano colexiado concernido en cada trámite do procedemento, co obxecto de poderen os seus membros acceder ao seu contido.
 - c) Cando a iniciativa para a concesión da Medalla proceder dun terzo dos centros adoptárase por acordo das súas Xuntas, após o exame do currículo ou relación de actividades de relevo da persoa física ou xurídica nominada, expresando sucintamente as razóns que amparan a concesión desta honra. Un mesmo centro só poderá apoiar unha iniciativa unha vez cada dous anos.
 - d) Para a concesión da Medalla de Ouro e da Medalla precisárase o acordo favorable de dous terzos dos membros do Consello de Goberno, en votación secreta.
 - e) A concesión da Medalla de Ouro e da Medalla notificarase mediante oficio do/a reitor/a, acompañando da certificación da Secretaría Xeral da Universidade. Deberá acompañar á medalla un diploma acreditativo da distinción outorgada.
 - f) A relación de Medallas concedidas deberá constar nun libro-rexistro da universidade, baixo a custodia do/a secretario/a xeral, para os efectos oportunos. En calquera caso, a propiedade e o uso da Medalla presupón o dereito exclusivo da persoa a quen se outorgou.
2. O Consello de Goberno pronunciarase acerca da concesión das Medallas unha soa vez ao ano, en sesión celebrada antes do solemne acto de inauguración do curso académico, debéndose presentar as correspondentes iniciativas de membros do Consello de Goberno e de centros no Rexistro Xeral durante a primeira quincena do mes de maio.
3. A entrega das Medallas terá lugar con ocasión do solemne acto de inauguración do curso académico ou da Festividade de San Tomé de Aquino.
4. A concesión e entrega das Medallas da Universidade da Coruña confire o dereito ao seu uso, en vieira sobre o traxe académico, e en fita sobre o peito nos demais casos, sendo compatible con calquera outra medalla ou condecoración que ostente o galardoado, sen prexuízo do que dispuxeren as normas de superior rango sobre o uso de condecoracións.
5. A concesión da Medalla será revogada cando medie fallo condenatorio en que se prive a persoa galardoada das súas honras e condecoracións e, así mesmo, cando a persoa distinguida con ela incorrese en conduta desleal



UNIVERSIDADE DA CORUÑA

cara á Universidade da Coruña ou nociva dos seus intereses e, neste caso, e por iniciativa de calquera órgano da comunidade universitaria, instruírse un expediente con audiencia da persoa interesada, propoñéndose a revogación ao Consello de Goberno en caso de se confirmaren os feitos, requiríndose maioría de dous terzos para a aprobación deste acordo.

Artigo 11. Do nomeamento de Doutor *honoris causa*

1. A Universidade da Coruña poderá nomear Doutor *honoris causa* a aquelas persoas físicas que destaquen no eido da investigación ou da docencia, no cultivo das artes e das letras ou ben naquelas actividades que tivesen unha repercusión notoria e importante desde o punto de vista universitario, no terreo científico, artístico, cultural, tecnolóxico e social de Galicia, e do mundo en xeral, en relación con Galicia.

2. O nomeamento de doutores *honoris causa* pola Universidade da Coruña seguirá os trámites procedementais que se establecen na normativa reguladora dos estudos de doutoramento da Universidade da Coruña.

Artigo 12. Do tratamento dos cargos académicos

1. Establécese o seguinte tratamento honorífico para os cargos académicos e representantes da Universidade da Coruña:

- a) Reitor/a: “Excelentísimo/a Señor/a Reitor/a Magnífico/a”, podendo usarse as abreviaturas “Excmo./a. Señor/a Reitor/a Magfo./a.” ou “Excmo./a. e Magfo./a. Señor/a Reitor/a” e, nos actos ditados por este, a abreviación “Reitor/a Magnífico/a”.
- b) Presidente do Consello Social, Vicerreitor/a e cargos asimilados: “Excelentísimo/a Señor/a”, podendo usarse a abreviatura “Excmo./a.Sr./a.”.
- c) Secretario/a Xeral, Xerente, Decano/a, Director/a de centro e cargos asimilados: “Ilustrísimo/a Señor/a”, podendo usarse a abreviatura “Ilmo./a. Sr./a.”.

2. A creación de cargos académicos distintos aos anteriormente recollidos levará consigo o tratamento concedido ao cargo asimilado correspondente segundo o asignado no parágrafo anterior.

3. O tratamento acompaña o cargo e non ao nome de quen o ostenta.

TÍTULO TERCEIRO DO CERIMONIAL

Artigo 13. Regras xerais de organización de actos académicos solemnes

1. Conforme á tradición e ás disposicións normativas de aplicación, a universidade convidará as autoridades e axentes sociais a asistiren aos actos académicos solemnes, coidando situalos en lugar preferente e de honra e reservando para tal efecto os lugares precisos no público, onde existirá, así mesmo, un espazo que poderá ser ocupado por calquera cidadán/á que, sen pertencer á comunidade universitaria, desexe asistir ao acto; de igual modo, reservarase un lugar do público para acoller a comitiva



UNIVERSIDADE DA CORUÑA

académica e os membros da comunidade universitaria, todo iso sen prexuízo do disposto no artigo 4 deste Regulamento.

2. Como regra xeral, o desenvolvemento dos actos académicos solemnes terá lugar de acordo coa seguinte secuencia:

- a) Entrada da comitiva académica no correspondente salón de actos, organizada segundo recolle este Capítulo e acompañada da interpretación do himno "*Veni creator*".
- b) Apertura da sesión a cargo do/a reitor/a.
- c) Desenvolvemento dos trámites propios do acto académico específico.
- d) Interpretación do himno universitario.
- e) Clausura da sesión.
- f) Abandono do salón de actos pola comitiva académica.

3. Cando conforme ao previsto no Real decreto 2099/1983, do 4 de agosto, o acto académico for presidido por persoa distinta do/a reitor/a, a secuencia prevista adecuarase a esa circunstancia, alterándose oportunamente a orde de intervencións.

4. A comitiva académica estará composta do seguinte modo (en orde inversa):

- a) Reitor/a.
- b) Máximas autoridades con competencia en materia de educación do Estado ou da Comunidade Autónoma.
- c) Restantes membros do equipo de dirección.
- d) Conferenciante (na Inauguración do Curso).
- e) Ex-Reitores e cargos académicos con rango de vicerreitor de acordo coa súa orde de precedencia.
- f) Membros da comunidade universitaria en posesión da Medalla da Universidade da Coruña.
- g) Membros do equipo de dirección doutras universidades.
- h) Antigos membros do equipo de dirección da Universidade da Coruña.
- i) Directores/as das academias oficiais co grao de doutor.
- j) Decanos/as e directores/as de centro.
- k) Doutores dos diferentes centros ou das academias oficiais.
- l) Doutorando/a *honoris causa* (no Acto de Investidura), acompañado do padriño/madriña.

5. De acordo coa tradición universitaria, o/a secretario/a xeral acompañará o/a reitor/a na comitiva académica, situándose ao seu lado esquerdo, e ocupando o extremo esquerdo da mesa presidencial dos actos académicos solemnes salvo que, segundo o disposto no Título I deste Regulamento, lle corresponder maior prelación.

6. O/A director/a ou presidente das academias oficialmente recoñecidas na Coruña, cando ostentar o grao de doutor, terá a consideración de persoal académico para os efectos de aplicación deste Título, podendo formar parte da comitiva académica e integrándose no sector académico do público, ostentando unha precedencia inmediatamente consecutiva aos antigos



UNIVERSIDADE DA CORUÑA

membros do equipo de dirección. Os restantes membros das academias oficiais recoñecidas na Coruña que ostentaren o grao de doutor poderán integrarse de igual modo na comitiva académica no lugar correspondente aos doutores dos centros universitarios.

7. Calquera outra persoa ou autoridade non recollida nesta prelación poderá integrarse na comitiva académica, segundo o criterio da Secretaría Xeral, de acordo coa natureza do acto e a representación ou participación que neste ostentar.

Artigo 14. Prelación entre centros

Os centros prelacionaranse pola súa data de creación.

Artigo 15. Da investidura do/a reitor/a

Para alén da secuencia xeral que establece para os actos académicos solemnes o artigo 13 deste Regulamento, a investidura do/a reitor/a terá como trámites específicos os seguintes:

1. Lectura do acordo de nomeamento por parte do/a secretario/a xeral en funcións.
2. Investidura do/a reitor/a cos atributos propios do seu rango, segundo se describen no Título IV deste Regulamento. Estes atributos seranlle entregados polo/a reitor/a saínte, salvo cando se invista o/a reitor/a para un segundo mandato consecutivo.
3. Toma de posesión do resto de membros do equipo de dirección que xa fosen nomeados nesa data, facéndoo en primeiro lugar o/a secretario/a xeral logo da lectura do seu nomeamento polo/a secretario/a xeral en funcións, e continuando os restantes membros do equipo de dirección de acordo coa prelación que entre eles establecese o/a reitor/a, logo da lectura do seu nomeamento polo novo/a secretario/a xeral, prestando cada un deles xuramento ou promesa e asinando no libro de tomas de posesión de cargos académicos.
4. Discurso, se for o caso, da autoridade competente en materia de educación do Estado ou da Comunidade Autónoma asistente ao acto.
5. Discurso de investidura do/a reitor/a.

Artigo 16. Da inauguración do curso académico

1. Anualmente celebrarase o solemne acto de inauguración do curso académico, na data que determine o/a reitor/a de acordo coa planificación da apertura do curso académico das universidades do sistema universitario de Galicia.

2. Para alén da secuencia xeral que establece para os actos académicos solemnes o artigo 13 deste Regulamento, a inauguración do curso académico terá como trámites específicos os seguintes:

- a) Lectura da Lección inaugural do curso académico, a cargo do profesor de maior categoría e antigüidade na UDC de cada centro, por orde anual sucesiva destes consonte a data da súa creación.



UNIVERSIDADE DA CORUÑA

- b) Entrega polo/a reitor/a das Medallas da Universidade da Coruña, após a lectura dos acordos de concesión polo/a secretario/a xeral e por chamamento deste/a, procedendo posteriormente unha das persoas galardoadas a pronunciar unhas palabras en nome de todos elas.
- c) Discurso, se for o caso, da autoridade competente en materia de educación do Estado ou da Comunidade autónoma asistente ao acto.
- d) Discurso do/a reitor/a.

Artigo 17. Da investura de Doutor/a *honoris causa*

1. Para alén da secuencia xeral que establece para os actos académicos solemnes o artigo 13 deste Regulamento, a investidura de doutores *honoris causa* terá como trámites específicos os seguintes:

- a) Lectura polo/a secretario/a xeral do acordo por que se concede o grao de doutor/a *honoris causa* de quen é ou quen serán investidos na sesión.
- b) Entrada do/a doutorando/a no salón de actos, conducido polo/a seu/súa padriño/madriña, acudindo este/a a acompañalo/a desde o salón de actos por indicación do/a reitor/a.
- c) Eloxio do/a doutorando/a, pronunciado polo/a seu/súa padriño/madriña, quen concluirá a súa intervención co rogo de que se outorgue e confira ao/á apadriñado/a o supremo grao de Doutor/a *honoris causa* pola Universidade da Coruña.
- d) Xuramento ou promesa do/a doutorando/a.
- e) Entrega polo/a reitor/a do título de Doutor/a *honoris causa*.
- f) Investidura polo/a reitor/a cos atributos propios do grao, a saber:
 - a. A medalla, símbolo do corazón que se ennobrece.
 - b. O barrete, símbolo dos estudos e merecementos.
- g) Entrega polo/a padriño/madriña doutros símbolos do grao, a saber:
 - a. O libro da ciencia e a sabedoría, símbolo de respecto e consideración aos mestres e que estará representado por unha obra relativa á rama de saber en que se concede a distinción.
 - b. O anel doutoral, símbolo do privilexio de asinar e selar os ditames e consultas propios da ciencia e profesión, que estará representado por unha sortella sinxela de ouro que terá gravado como selo o emblema da Universidade da Coruña.
 - c. As luvas brancas, símbolo de pureza e distinción.
- g) Abrazo de fraternidade e acollida no Claustro de profesores, representados nas persoas do/a reitor/a e do/a padriño/madriña.
- h) Discurso do/a novo/a doutor/a.
- i) Discurso do/a reitor/a.

2. Poderá celebrarse un acto académico específico para cada investidura ou ben agrupar varias investiduras nun só acto cando as circunstancias así o requiriren. Neste caso procederase á verificación sucesiva en cada investidura dos trámites recollidos no apartado anterior.



UNIVERSIDADE DA CORUÑA

Artigo 18. Da festividade de San Tomé de Aquino

Organizarase un solemne acto académico en conmemoración da Festividade de San Tomé de Aquino, que se celebrará o 28 de xaneiro (San Tomé) ou nas súas inmediacións e en que incluírá a investidura de novos doutores, a entrega de premios extraordinarios de licenciatura ou doutoramento, ou doutros premios e distincións.

TÍTULO IV DOS SÍMBOLOS

Artigo 19. Disposicións xerais

1. De conformidade co previsto no Real Decreto de 6 de marzo de 1850, nos Decretos do 4 de agosto de 1944, na Orde do 30 de novembro de 1967 e nas restantes disposicións que os modifican e desenvolven, así como en razón do uso e costume universitarios, as cores propias das diferentes titulacións son as seguintes, entre outras:

- a) Branca, a de Teoloxía.
- b) Encarnada granate, a de Dereito.
- c) Amarela ouro, a de Medicina.
- d) Morada, a de Farmacia.
- e) Azul celeste, a de Filosofía e Letras: Xeografía e Historia, Filoloxía e Ciencias da Educación.
- f) Azul turquí, a de Ciencias: Física, Xeoloxía, Matemáticas, Química, Bioloxía e Informática.
- g) Verde, a de Veterinaria.
- h) Verde clara, a de Ciencias da Actividade Física e Deportiva.
- i) Alaranxada, a de Ciencias Políticas, Socioloxía, Económicas e Empresariais.
- j) Gris medio, a de Enfermaría.
- k) Gris azulada, a de Ciencias da Información.
- l) Violeta, a de Psicoloxía.
- m) Marrón, a de titulacións concedidas polas escolas técnicas.

2. O Consello de Goberno, por proposta do centro concernido, poderá asignar as mesmas ou outras cores a novas titulacións universitarias non consideradas neste Regulamento, de acordo co uso xeralmente establecido noutras universidades españolas.

Artigo 20. Do selo ou emblema da Universidade da Coruña

1. Neste momento, o selo da Universidade da Coruña é unha elipse que contén seis feixes de luz que parten do faro ou torre (3 de cada lado), que representan o símbolo da cidade a Torre de Hércules e á súa vez o saber. Os feixes de luz e a torre teñen fondo granate, limitado cada espazo por fío de prata. Esta elipse está coroada cunha fita que contén o lema da Universidade da Coruña "HAC LUCE" (CON ESTA LUZ), en cor azul e letras en prata.



UNIVERSIDADE DA CORUÑA

2. O emblema será impreso en cor púrpura-granate, esmalte heráldico que simboliza o enxeño, a verdade, a sabedoría e a xustiza, sobre fondo azul, esmalte heráldico que simboliza a ciencia e o cultivo das belas letras.
3. Baixo ou xunto ao emblema poderá utilizarse a lenda "Universidade da Coruña", impresa en tinta de igual cor que a do emblema.

Artigo 21. Do uso do selo ou emblema

1. Prohíbese a alteración do emblema da universidade, así como o uso dos seus compoñentes para a súa incorporación ao emblema ou logotipo doutros órganos ou actividades da propia Universidade da Coruña ou de terceiros.
2. Non obstante, o Consello de Goberno poderá aprobar un Manual de Imaxe Corporativa en que se conteñan posibles transformacións do emblema da universidade para o seu uso como logotipo en cartellaría, remendaría, accións publicitarias e outras actuacións de análoga natureza.

Artigo 22. Do uso do emblema polos centros, departamentos e outros órganos

1. De acordo coa tradición universitaria, os centros e departamentos poderán imprimir o emblema da Universidade da Coruña na súa remendaría, cartellaría, ou accións publicitarias, facendo constar en cada caso o centro ou departamento de que se trate baixo ou xunto á imaxe gráfica do emblema.
2. Así mesmo, os centros, departamentos, institutos universitarios e órganos dependentes dos servizos centrais poderán establecer logotipos propios, mediante acordo adoptado para o efecto e ratificado polo Consello de Goberno. O seu uso virá sempre asociado ao do emblema da Universidade da Coruña, que ocupará un lugar inseparable e preferente nos impresos de remendaría, cartalería ou publicidade.

Artigo 23. Da bandeira da Universidade da Coruña

1. A bandeira da Universidade da Coruña estará composta polo seu emblema, baixo o cal se situará a lenda "Universidade da Coruña", impresa en tinta de igual cor que a do emblema, todo iso sobre fondo de igual cor que a do fondo do emblema.
2. O uso da Bandeira da Universidade da Coruña será de conformidade coa Lei 39/1981, do 28 de outubro, que regula o uso da Bandeira de España e o doutras Bandeiras e Insignias e co acordo do Consello de Goberno da Xunta de Galicia, que regula o uso da Bandeira de Galicia.
3. A Bandeira da Universidade da Coruña utilizarase xunto coa Bandeira de España, a Bandeira de Galicia e, se for o caso, a Bandeira da Unión Europea, de acordo coa seguinte orde:
 - a) A Bandeira de España ocupará o lugar central se o número de bandeiras for impar ou o lugar dereito (esquerdo para a persoa observadora) das dúas posicións que ocupan o centro, se o número de bandeiras for par.
 - b) A Bandeira de Galicia e a Bandeira da Universidade da Coruña situaranse, respectivamente, a dereita e esquerda da Bandeira de



UNIVERSIDADE DA CORUÑA

España (esquerda e dereita, respectivamente, para a persoa observadora).

- c) Cando se utilice a Bandeira da Unión Europea, esta situarase en calquera posición tras a Bandeira de España, desprazando ás restantes segundo o establecido na letra anterior.

4. En atención á natureza xurídica da universidade e ao seu ámbito competencial, nos actos académicos e nos edificios e dependencias universitarias evitarase o emprego de bandeiras propias das entidades locais.

5. As bandeiras ondearán no exterior de todos os edificios da Universidade da Coruña en que teñan a súa sede a reitoría, os centros e os institutos universitarios, situándose, ademais, xunto ao retrato da S.M. o/a Rei/Raíña, nas dependencias interiores dos devanditos edificios que ocuparen cargos académicos de rango igual ou superior a decano ou director de centro, ou que se destinaren á celebración de actos académicos e reunións de órganos colexiados.

Artigo 24. Do himno universitario

1. Establécese como himno universitario a composición coñecida como "*Gaudeamus igitur*", na versión harmonizada reducida proposta polo mestre Casulleras.

2. Cando se deba executar o himno universitario interpretaranse como regra xeral as súas dúas primeiras estrofas.

3. Como regra xeral, o himno universitario será o único que se interprete nas solemnidades académicas. Non obstante, cando se deban interpretar así mesmo os himnos de Galicia e España de acordo co Real Decreto 1560/1997, do 10 de outubro, que establece as súas normas reguladoras, este executarase en primeiro lugar se os himnos se interpretaren ao inicio do acto, e en último lugar se os himnos se interpretaren á conclusión deste.

Artigo 25. Do traxe académico

1. O traxe académico utilizarano os licenciados e doutores asistentes aos actos solemnes de acordo co uso e costume universitarios.

2. Conforme á tradición e ás disposicións que regulan a súa composición, o traxe académico reúne os seguintes elementos:

- d) A toga profesional negra, baixo a que se levará traxe enteiramente negro, con camisa e gravata de lazo brancas. No caso de doutores, a toga disporá de voltas ou puños de encaixe, sobre un vivo de igual tecido e cor que a muceta, salvo no caso do/a reitor/a, cuxo vivo será de cor rosa violácea.

- e) A muceta, que será de raso da cor da titulación correspondente, sendo a do/a reitor/a de veludo negro, forrada en ambos os dous casos de seda negra, con gran cugula e abotoada por diante na mesma cor da muceta, salvo no caso das escolas técnicas superiores, que non disporá de cugula, pendendo no seu lugar unha borla alongada de cor dourada do vértice posterior da muceta.



UNIVERSIDADE DA CORUÑA

- f) Tratándose de doutores, o barrete negro, de forma octogonal, con borla compacta que o cubra enteiramente, pendendo sobre as súas caras laterais uns flocos longos de igual altura que a devanditas caras, sendo a borla e flocos da mesma cor da muceta. As persoas que vestiren traxe académico cubriranse co barrete mentres permanezan en pé, descubríndose cando se atoparen sentados; porén, aquelas que deban realizar intervencións prolongadas en pé quedan dispensadas de estar cubertas.
 - g) Tratándose de doutores, luvas de cor branca.
3. Os licenciados ou doutores que foren licenciados noutra titulación poderán levar intercalados os botóns da muceta da cor correspondente a ela, así como mesturar por partes iguais as cores correspondentes na borla compacta do barrete; e os que ostentaren o grao de doutor en titulacións diferentes poderán mesturar nos flocos do barrete fíos de seda das correspondentes cores en iguais proporcións.
 4. Sobre o traxe académico levarase a Medalla Profesorial ou a Medalla Doutoral, de acordo co deseño establecido no Real decreto do 6 de marzo de 1850, na Real orde do 13 de xuño de 1893 e nas disposicións que posteriormente os modifican.
 5. O/a reitor/a usará a Medalla propia do seu rango en lugar da que corresponder á súa titulación, segundo define o propio Real decreto do 6 de marzo de 1850, e levará ademais o Bastón propio do seu rango.
 6. Os ex-reitores poderán usar o traxe de reitor, desprovisto da Medalla e do Bastón.

DISPOSICIÓN ADICIONAIS

Corresponde á Secretaría Xeral da Universidade da Coruña garantir a correcta aplicación do presente Regulamento e resolver as dúbidas que esta puiden formular.

DISPOSICIÓN TRANSITORIA

En tanto que o Consello de Goberno proceder á aprobación do Manual de Imaxe Corporativa da Universidade da Coruña, poderase alterar o emblema da universidade en uso como logotipo para o seu emprego en remendaría, cartalaría ou accións publicitarias, sempre que a alteración respecte os elementos esenciais do emblema e a súa ordenación no espazo e consista simplemente na aparición dun fragmento do total ou nunha deformación do emblema que non supoña degradación da imaxe da universidade. Así mesmo, autorízase a representación do fondo do emblema coa cor crema do soporte en que se imprimir, especialmente cando se utilizar papel da devandita cor, evitando deste modo a representación do fondo en cor amarela de ouro.

DISPOSICIÓN DERROGATORIA

Queda derrogado o Regulamento da Medalla da Universidade da Coruña, aprobado en Xunta de Goberno do 16 de abril de 1996. Recoñécese a vixencia do deseño das Medallas concedidas durante a súa aplicación;



UNIVERSIDADE DA CORUÑA

porén, a Universidade da Coruña poderá remitir ás persoas galardoadas novas Medallas, de acordo co deseño establecido neste Regulamento, para o seu uso no futuro, sen prexuízo de conservar as inicialmente entregadas.

DISPOSICIÓN FINAL

Esta disposición entrará en vigor ao día seguinte da súa aprobación polo Consello de Goberno.



ANEXO I

PRECEDENCIAS ENTRE AUTORIDADES E PERSONALIDADES NON UNIVERSITARIAS

establécese a seguinte prelación entre autoridades e personalidades que participen nos actos de carácter especial organizados pola Universidade da Coruña:

1. Rei ou Raíña.
2. Raíña consorte ou Consorte da Raíña.
3. Príncipe ou Princesa de Asturias.
4. Infantes de España.
5. Presidente do Goberno.
6. Presidente do Congreso dos Deputados.
7. Presidente do Senado.
8. Presidente do Tribunal Constitucional.
9. Presidente do Consello Xeral do Poder Xudicial.
10. Presidente da Xunta de Galicia.
11. Vicepresidente do Goberno, segundo a súa orde.
12. Ministros do Goberno, segundo a súa orde.
13. Decano do corpo diplomático e embaixadores estranxeiros acreditados en España.
14. Ex-presidente do Goberno.
15. Presidentes dos Consellos de Goberno doutras Comunidades Autónomas.
16. Presidente do Parlamento de Galicia.
17. Delegado do Goberno na Comunidade Autónoma de Galicia.
18. Alcalde do municipio do lugar.
19. Xefe da Casa da Súa Maxestade o Rei.
20. Presidente do Consello de Estado.
21. Presidente do Tribunal de Contas.
22. Fiscal xeral do Estado.
23. Valedor do Pobo.
24. Secretarios de Estado, segundo a súa orde e Presidente da Xunta de Xefes de Estado Maior e Xefes de Estado Maior dos Exércitos de Terra, Mar e Aire.
25. Vicepresidentes das Mesas do Congreso dos Deputados e do Senado, segundo a súa orde.
26. Presidente do Consello Supremo de Xustiza Militar.
27. Capitán Xeneral da Rexión Militar, Capitán Xeneral e Comandante Xeneral da Zona Marítima, Xefe da Rexión ou Zona Aérea e Comandante Xeneral da Frota, segundo a súa orde.
28. Xefe do Cuarto Militar e Secretario Xeral da Casa da Súa Maxestade o Rei.



UNIVERSIDADE DA CORUÑA

29. Membros do Consello de Goberno da Comunidade Autónoma, segundo a súa orde.
30. Membros da Mesa do Parlamento de Galicia.
31. Presidente do Consello Consultivo de Galicia.
32. Presidente do Tribunal de Contas de Galicia.
33. Presidente e Fiscal do Tribunal Superior de Xustiza de Galicia.
34. Subsecretarios (de ministerios da Administración do Estado) e asimilados, segundo a súa orde.
35. Secretarios das Mesas do Congreso dos Deputados e do Senado, segundo a súa orde.
36. Encargados de Negocios Estranxeiros acreditados en España.
37. Presidente do Instituto de España.
38. Xefe de Protocolo do Estado.
39. Presidente da Deputación Provincial .
40. Delegado do Goberno en Galicia.
41. Subdelegado do Goberno .
42. Directores xerais da Administración do Estado e asimilados, segundo a súa orde.
43. Deputados e Senadores pola Provincia da Coruña.
44. Viceconselleiros da Xunta de Galicia e asimilados, segundo a súa orde.
45. Directores xerais da Xunta de Galicia e asimilados, segundo a súa orde.
46. Reitores de universidade en cuxo distrito teña lugar o acto, segundo a antigüidade da universidade.
47. Presidente da Audiencia Provincial.
48. Gobernador militar e Xefes dos Sectores Naval e Aéreo.
49. Tenentes de Alcalde do concello do lugar.
50. Comandante militar da praza, Comandante ou Axudante militar de Mariña e Autoridade aérea local.
51. Representantes consulares estranxeiros.
52. Medallas da Universidade da Coruña que non pertencen á comunidade universitaria.
53. Membros do Consello Social.
54. Director ou Presidente das Academias oficiais.
55. Deputados do Parlamento de Galicia pola Provincia da Coruña.
56. Directores Provinciais de Ministerios na Coruña.
57. Delegados de Consellerías da Xunta de Galicia na Coruña.
58. Vicepresidentes da Deputación Provincial.
59. Membros das academias oficiais.
60. Secretario Xeral da Delegación e da Subdelegación do Goberno.
61. Alcaldes da provincia.



UNIVERSIDADE DA CORUÑA

62. Corporación municipal do lugar de celebración do acto.
63. Deputados da Deputación Provincial.
64. Membros da Audiencia Provincial.
65. Membros da Cámara Oficial de Comercio, Industria e Navegación.
66. Concelleiros municipais que non sexan Tenentes de Alcalde do Concello da Coruña, nin membros da corporación do lugar de celebración do acto.
67. Representantes de partidos políticos.
68. Representantes de patronal.
69. Representantes de sindicatos.



UNIVERSIDADE DA CORUÑA